

# Usaha dan Pendekatan Pematuhan Syariah dalam Organisasi Angkatan Tentera Malaysia oleh Kor Agama Angkatan Tentera (KAGAT)

Burhanuddin Jalal<sup>1\*</sup>, Siti Arni Basir<sup>2</sup>, Hassan al-Banna Mohammed<sup>3</sup>, Badlihisam Mohd Nasir<sup>4</sup>

<sup>1</sup>Fakulti Pengajian Pengurusan dan Pertahanan, Universiti Pertahanan Nasional Malaysia, 57000 Kuala Lumpur, Malaysia

<sup>2</sup>Akademi Pengajian Islam, Universiti Malaya, 50603 Kuala Lumpur

<sup>3</sup>Fakulti Pengajian Pengurusan dan Pertahanan Universiti Pertahanan Nasional Malaysia, 57000 Kuala Lumpur, Malaysia

<sup>4</sup>Akademi Tamadun Islam, Fakulti Sains Sosial dan Kemanusiaan, Universiti Teknologi Malaysia, 81310, Skudai Malaysia

\*Corresponding Authors

burhanuddin@upnm.edu.my\*, sitiarni@um.edu.my,  
hassan.albanna@upnm.edu.my, badlihisam@utm.my

Received: 30 April 2022

Accepted: 12 October 2022

Online First: 15 November 2022

## ABSTRAK

*Dasar Penerapan Nilai-nilai Islam dalam Pentadbiran merupakan dasar yang diperkenalkan oleh Kerajaan Malaysia pada 1985 oleh Perdana Menteri, Dato' Seri Dr. Mahathir Mohamad. Dasar ini merupakan kesinambungan daripada usaha-usaha kerajaan yang telah dilakukan seperti penubuhan pelbagai organisai berteraskan Islam serta pengukuhan Bahagian Hal-Ehwal Islam, Jabatan Perdana Menteri. Selaras dengan itu, organisasi Angkatan Tentera Malaysia (ATM) turut berusaha ke arah penerapan nilai-nilai Islam dalam organisasi bagi menghakis pengaruh tradisi tentera British yang bertentangan dengan tradisi Melayu dan Islam. Penubuhan Kor Agama angkatan Tentera Malaysia (KAGAT) pada tahun 1985 merupakan salah satu usaha ke arah pematuhan syariah dalam ATM. Objektif kajian ini adalah untuk meneroka usaha-usaha KAGAT untuk memenuhi keperluan pematuhan syariah dalam organisasi ATM. Selain itu, objektif kajian ini juga adalah untuk mengkaji pendekatan yang dilaksanakan untuk kepatuhan kepada Syariah di ATM. Kajian ini merupakan kajian kualitatif dan menggunakan kaedah kajian perpustakaan dan semakan dokumen sebagai kaedah*

*pengumpulan data. Manakala kaedah analisis tematik digunakan untuk menganalisis data. Hasil kajian menunjukkan usaha-usaha pematuhan syariah telah dilaksanakan secara efektif dengan menggunakan pendekatan yang sesuai. Pematuhan Syariah telah meningkat dan membawa impak yang baik terhadap kejayaan KAGAT dalam pelaksanaan dakwah secara lebih menyeluruh dan berterusan untuk membina Angkatan Tentera Malaysia yang berwibawa serta mempunyai daya tempur yang kuat serta rohani yang mantap. Kajian ini akan mengisi kelompangan literatur berkenaan dengan aspek pematuhan Syariah dan kaedah yang digunakan di ATM kerana kajian seperti ini masih begitu kurang diteroka oleh para pengkaji lepas.*

**Katakunci:** Angkatan Tentera Malaysia, Keselamatan, Patuh Syariah, Pertahanan

## **Shariah Compliance Efforts in the Malaysian Armed Forces Organisation by the Armed Forces Religious Corps (KAGAT)**

### **ABSTRACT**

*The Inculcation of Islamic Values Policy is a policy introduced by the Government of Malaysia in 1985 by the Prime Minister, Tun Mahathir Mohamad. This policy is a continuation of the efforts of the Malaysian government that have been accomplished such as the establishment of various organizations based on Islamic values. In line with that, the Malaysian Armed Forces organization is also working towards the application of values in Islam in the organization to erode the influence of the British military tradition which is contrary to the Malay and Islamic traditions. The establishment of the Religious Corps of the Malaysian Armed Forces in 1985 was one of the efforts toward Syariah compliance in the Malaysian Armed Forces. The objective of this study is to explore KAGAT's efforts to meet shariah compliance requirements in ATM organizations. In addition, the objective of this study is to examine the approaches implemented to implement Syariah compliance in ATMs. This qualitative study uses library research methods and document review as data collection methods. While the thematic analysis method is used to analyze the data. The research findings show that Syariah compliance efforts have been implemented effectively using appropriate approaches. Syariah compliance has increased and brought a positive impact to the success of KAGAT in the implementation of dakwah more comprehensively and continuously to build a competent Malaysian Armed Forces with a strong combat force and a strong spirit. This study fills the gaps in the*

*literature regarding aspects of Shariah compliance and methods used in the Malaysian Armed Forces because such studies are still so barely explored by past researchers.*

**Keywords:** Malaysian Armed Forces, Security, Shariah Compliant, Defence

## **PENGENALAN**

Kekuatan angkatan tentera bukan hanya bergantung kepada aspek fizikal dan ketersediaan senjata sahaja, tetapi juga bergantung kepada aspek sahsiah dan kerohanian. Ini kerana kekuatan spiritual sangat diperlukan untuk membina daya tahan anggota tentera dalam berhadapan dengan tugas yang mencabar. Oleh itu, Kor Agama Angkatan Tentera Malaysia (KAGAT), telah ditubuhkan dengan matlamat utamanya untuk membina kekuatan akidah, syariah dan spiritual anggota tentera. Kekuatan sahsiah dan kerohanian anggota tentera dibina dengan memupuk kepatuhan mereka terhadap syariah. Setakat ini, KAGAT telah melaksanakan pelbagai usaha dan menggunakan pendekatan tertentu untuk memastikan kerjaya dan kehidupan para anggota tentera sentiasa mematuhi kehendak Syariah. Namun begitu, kajian mengenai usaha-usaha KAGAT untuk memenuhi keperluan pematuhan syariah dalam organisasi Angkatan Tentera Malaysia (ATM) masih kurang dijalankan. Oleh itu, objektif kajian ini adalah untuk meneroka usaha-usaha KAGAT untuk memenuhi keperluan pematuhan syariah dalam organisasi ATM. Selain itu, objektif kajian ini adalah untuk mengkaji pendekatan yang dilaksanakan bagi kepatuhan kepada Syariah di ATM. Kajian ini diharapkan mengisi kelompangan literatur berkenaan dengan aspek pematuhan Syariah dan kaedah yang digunakan di ATM.

## **METODOLOGI KAJIAN**

Kajian kualitatif ini menggunakan kaedah kajian perpustakaan dan semakan dokumen sebagai kaedah pengumpulan data. Menurut Mokmin Basri (2012), analisis dokumen adalah proses mengumpul data kajian melalui penyelidikan, penyiasatan, pemeriksaan, pencerakinan dan penganalisan terperinci yang dibuat terhadap bahan bertulis atau bahan yang diamati berkaitan dengan perkara yang dikaji. Dalam kajian ini, dokumen-dokumen berkenaan pelaksanaan pematuhan Syariah telah dikumpulkan. Selepas itu, data yang terkandung dalam dokumen-dokumen tersebut telah dianalisis dengan menggunakan metod analisis tema seperti yang dicadangkan oleh Braun & Clarke (2006). Daripada data-data yang telah dianalisis, tema-tema berkenaan dengan usaha dan

pendekatan pematuhan Syariah telah dikenalpasti dan dibangunkan. Selepas itu, pengkaji telah menulis laporan mengenai hasil kajian berkenaan dengan usaha-usaha pematuhan Syariah dalam organisasi Angkatan Tentera Malaysia.

## KAJIAN LITERATUR

Syariat dan hukum yang terkandung dalam al-Quran dan al-Sunnah terdiri daripada panduan dan petunjuk yang membantu manusia untuk mencapai kebahagiaan serta kemaslahatan di dunia dan akhirat (Muhammad Thalib, 2001). Ini sejajar dengan pandangan ulama yang menyatakan bahawa Allah SWT menetapkan syariat-Nya untuk memberi kebaikan (*maslahah*) kepada manusia baik dalam tempoh kehidupannya yang semasa atau yang akan datang. Secara tidak langsung dapatlah difahami bahawa sekiranya manusia mematuhi panduan yang diturunkan oleh Allah SWT ini, maka manusia dapat mengelak kerosakan atau keburukan (*mafsadah*) daripada berlaku atau menimpa mereka. Secara teori, orang Islam yang taat dan mematuhi segala ajaran agama akan menghasilkan prestasi yang berkualiti dalam semua aspek kehidupannya baik yang bersifat kerohanian, kemasyarakatan, individu, ekonomi, tadbir urus dan sebagainya (Wahbah Al-Zuhaily, 1994).

Hal ini tidak terkecuali terkait dengan aspek pengurusan pentadbiran ketenteraan. Sungguhpun konsep ketenteraan dan pertahanan negara itu sendiri datang secara langsung daripada al-Quran dan al-Sunnah, namun proses menyediakan angkatan tentera yang kuat, profesional dan berwibawa bukanlah sesuatu yang bersifat tabii semata-mata. Ertinya bukanlah disebabkan adanya musuh atau terdapatnya ancaman ke atas sesebuah negara menyebabkan sesebuah negara itu perlu membentuk angkatan tentera yang mungkin dapat menangani persoalan keselamatan dan pertahanan. Sebenarnya pembentukan angkatan tentera di sesebuah negara khususnya negara yang dikuasai oleh umat Islam, adalah sesuatu yang diperintahkan oleh Allah SWT. Ini jelas seperti yang telah difirmankan oleh Allah dalam al-Quran yang bermaksud:

*“Dan sediakanlah untuk menentang mereka (musuh yang menceroboh) segala jenis kekuatan yang dapat kamu sediakan dan dari pasukan-pasukan berkuda yang lengkap sedia, untuk menggerunkan dengan persediaan itu musuh Allah dan musuh kamu serta musuh-musuh yang lain daripada mereka yang kamu tidak mengetahuinya, sedang*

*Allah mengetahuinya. Dan apa sahaja yang kamu belanjakan pada jalan Allah akan disempurnakan balasannya kepada kamu, dan kamu tidak akan dianiaya.”*

Surah al-Anfal, 8: 60

Pembangunan angkatan tentera yang kuat untuk pertahanan negara sebenarnya menepati kehendak Maqasid Syariah. Ibnu Ashur menyatakan *Maqasid Syariah* merupakan konsep teras kepada pensyariatan agama Islam. Perkataan ‘*maqasid*’ atau ‘*maqsad*’ dalam bahasa Arab adalah berasalnya daripada kata dasar ‘*qasdun*’ yang membawa pelbagai makna antaranya tujuan, matlamat, menuju ke satu arah, dan berjalan lurus. Apabila dinisbahkan kepada perkataan ‘*syariah*’, maka ia bererti tujuan atau matlamat di sebalik undang-undang syarak. Secara asasnya, *Maqasid Syariah* merujuk kepada tujuan-tujuan serta rahsia-rahsia yang terkandung dalam sesuatu hukum yang berasaskan kepada pemeliharaan kemaslahatan manusia di dunia dan di akhirat (Ibn Ashur, 2001).

Menurut Muhammad Hashim (2011), sebahagian ulama seperti Al-Juwayni menggunakan istilah *masalih* (masalah) dalam menggambarkan *Maqasid Syariah* sekaligus menunjukkan perkaitan yang rapat antara matlamat syariat Islam dengan kemaslahatan manusia sejabat. Prinsip utama *Maqasid Syariah* adalah untuk memelihara lima perkara iaitu memelihara agama, nyawa, akal, keturunan dan harta (Bayan Linnas, 2019). Pembentukan angkatan tentera yang kuat amat diperlukan untuk melindungi dan mempertahankan kelima-lima komponen dalam Maqasid Syariah tersebut demi kemaslahatan ummah. Oleh itu, menjadi kewajipan sesebuah negara untuk membangunkan angkatan tentera yang kuat melalui pendekatan atau formula tertentu yang boleh dibangunkan.

Dalam usaha membentuk angkatan tentera yang mantap dan digeruni, suatu formula yang benar-benar berkeupayaan melahirkan anggota yang cekap dan berwibawa perlu dilaksanakan. Aspek-aspek latihan seperti mendisiplinkan anggota, melatih kecekapan menggunakan senjata, membentuk moral anggota supaya taat kepada arahan, kuat bekerja dan tidak melakukan sebarang penyelewengan adalah sesuatu yang perlu dititikberatkan. Namun demikian, kejayaan aspek-aspek tersebut tidak boleh diharapkan tanpa ada satu lagi elemen penting dalam pembentuk diri anggota tentera. Elemen tersebut ialah elemen ‘kerohanian’ yang ada hubungannya dengan keimanan, ketakwaan, dan kepercayaan kepada agama (Jabatan Arah KAGAT, 1992).

Keperluan tentera untuk memiliki kekuatan rohani diakui oleh sarjana psikologi. Ini boleh difahami daripada kenyataan berikut: "*Apabila ia berkenaan dengan daya tahan, sumber terdalam pembaharuan, kebangkitan dan ketahanan adalah asas rohani,*" kata Dr Lisa Miller, Profesor Psikologi dan Pendidikan di Universiti Columbia, apabila ditanya mengapa sangat penting bagi askar untuk mengekalkan asas rohani yang kuat. Beliau seterusnya menambah dengan berkata: "*Jika anda mahukan seseorang yang berdaya tahan dan mempunyai ketabahan dan keazaman, bina asas rohaninya. Itu membolehkan seseorang individu itu beraksi melepasi kapasiti biasa untuk membolehkan mereka bertarung apabila berasa letih dan tewas dan hancur.*" (Nina, 2020).

Kepentingan pengukuhan nilai-nilai rohani ini perlu terus digerakkan bagi memastikan warga Angkatan Tentera Malaysia dapat melaksanakan tugas dengan cekap dan berkesan. Jeneral Tan Sri Dato' Ismail bin Jamaluddin Panglima Tentera Darat Malaysia, dalam perintah ulung pelantikannya sebagai Panglima Tentera Darat telah menegaskan dalam konteks latihan dalam pasukan Tentera Darat dan untuk membina profesionalisme dan pembangunan insan, aspek latihan berunsur kerohanian hendaklah dititik beratkan. Aspek ini penting bagi mengukuhkan landasan latihan supaya lebih berkesan (Berita Tentera Darat, 2008).

Bagi memastikan warga tentera keseluruhannya dapat dibentuk dan dididik, proses pembinaan dan pembangunan yang berterusan melalui latihan yang sistematik amat diperlukan. Pembinaan ini memerlukan kepada dua elemen penting iaitu golongan yang membentuk (para anggota Agama ATM atau KAGAT) dan golongan yang dibentuk (anggota ATM keseluruhannya). Menurut Muhammad Ahmad Bashil (1989) dalam, bukunya, Politik dan ketenteraan – Perjanjian Hudaibiyah, telah menjelaskan bahawa, usaha-usaha untuk membentuk anggota tentera yang boleh memahami tugas mereka dengan berkesan dan dalam masa yang sama menjadi hamba Allah yang taat memerlukan usaha dakwah dan pendidikan yang berterusan.

Kenyataan-kenyataan di atas jelas menunjukkan bahawa betapa pentingnya ilmu akidah, syariah, akhlak dan kerohanian kepada diri anggota Angkatan Tentera Malaysia, dalam menghakis pengaruh negatif sekularisme dalam membentuk dan membangunkan mereka menjadi khalifah Allah yang bertakwa. Oleh yang KAGAT telah diberikan tugas,

peranan dan tanggungjawab bagi membina aspek penghayatan agama dan kerohanian dalam kalangan anggota Angkatan Tentera Malaysia.

Terdapat lima aspek pendidikan (*tarbiyah*) bagi membina generasi muda untuk menghayati Islam dan semangat jihad dari konteks pendidikan ketenteraan. Aspek ini penting kerana dengan adanya pendidikan atau *tarbiyah* ini dapat membina generasi muda yang mempunyai semangat ketenteraan yang mantap dan benar-benar menghayati Islam serta memahami penghayatan jihad. Persiapan atau pendidikan yang dimaksudkan adalah seperti berikut:

- a. *Tarbiyah ruhiyah* (pendidikan spiritual) yang dapat membina kekuatan diri dari cabaran kemewahan dan keduniaan.
- b. *Tarbiyah fikriyah* (pendidikan intelektual) yang dapat membina dan menghayati pengertian jihad dalam Islam.
- c. *Tarbiyah nafsiah* (pendidikan mental), yang dapat mendidik mereka bersedia untuk berkorban harta, dan jiwa raga demi Islam dan negaranya.
- d. *Tarbiyah badaniyah* (pendidikan fizikal) yang dapat membina tenaga fizikal generasi muda menjadi kuat dan berwibawa serta mampu menggalas cabaran berjuang di medan perang.
- e. *Tarbiyah ijtima'iyah* (pendidikan kemasyarakatan) yang dapat membina jiwa dan sifat terpuji untuk memahami keperluan masyarakat, sedia membantu, menghayati sikap bermesyuarat dan mampu membebaskan diri dari sikap-sikap negatif dan ego serta mampu menghindari sikap mementingkan diri sendiri. (Khalid Ahmad Syantut, 2003)

## **Penubuhan Kor Agama Angkatan Tentera (KAGAT)**

Kesedaran untuk terus meninggikan syiar Islam dalam perkhidmatan angkatan tentera tentunya mewarisi kesinambungan perjuangan Rasulullah, para sahabat dan juga para ulama dan ilmuwan Islam terdahulu. Cabaran untuk meneruskan syiar Islam ini memang wujud sejak zaman Rasulullah lagi. Ini seperti yang sebut oleh Majid Khadduri, “*Allah gave Prophet Muhammad four swords (for fighting the un believers): the first against polytheist, which Muhammad himself fought; the second against apostates, which Caliph Abu Bakar fought; the third against the people of the book, which caliph Umar fought with; and the fourth against dissenters, which caliph Ali fought with*” (Majid Khadduri, 1969).

Menyorot proses dakwah yang dilakukan oleh Rasulullah SAW,

ternyata pada peringkat awal hanya menyebarkan Islam secara ‘senyap’ dalam kalangan kaum keluarga dan sahabat yang terdekat sahaja. Selepas beberapa tahun menerima wahyu yang pertama, Baginda mula berdakwah secara terbuka sehingga Baginda mendapat ancaman dari pihak musuh, serta keselamatan diri Baginda sentiasa terancam dan dihina oleh kaum sendiri. Bentuk perjuangan menyebarkan, meninggikan syiar Islam serta usaha-usaha penghayatan agama dan dakwah dalam perkhidmatan Angkatan Tentera Malaysia juga mengalami bentuk perjuangan yang sama, cuma yang membezakan ialah dari segi cabaran yang perlu dihadapi. Seperti mana yang telah disebutkan kesan dari perubahan sosiobudaya dan politik negara serta masyarakat, khususnya menjelang tahun 80an, terdapat usaha-usaha ke arah proses penerapan nilai-nilai Islam di dalam pelbagai sektor kerajaan. Dalam hal ini, usaha penerapan nilai-nilai Islam dalam organisasi ketenteraan turut mengalami proses yang sama seiring dengan sektor-sektor awam yang lain.

Ekoran daripada perkembangan di atas, idea dan usaha mengembangkan perkhidmatan agama sebagai suatu organisasi dalam satu bentuk kor di bawah perkhidmatan ATM mula digerakkan. Di samping untuk mendekatkan anggota agama ke arah *militarization*, terdapat faktor lain yang mendorong penubuhan KAGAT dengan kadar segera iaitu:

- a. Merancang, menyelaras dan melaksanakan usaha-usaha dakwah Islamiah dan penghayatan Islam kepada semua pegawai dan anggota dalam ATM.
- b. Memberi dan mengembangkan pengajaran ilmu-ilmu Islam khususnya penekanan kepada ketinggian akhlak, sikap dan sifat (*spirit de corps*) di samping memberi kefahaman di dalam erti kata sebenar tentang perkhidmatan tentera mengikut pandangan Islam.
- c. Melaksana dan menguatkuasakan segala peraturan, undang-undang dan hukum Islam yang telah diputuskan oleh Majlis Agama Islam Persekutuan dan negeri-negeri.
- d. Memberi bantuan kepada usaha-usaha mempertingkatkan semangat keperwiraan anggota tentera seimbang dengan misi perjuangan ATM (Burhanuddin Jalal, 1998).

Usaha-usaha awal ke arah penubuhan KAGAT dimulakan sejak akhir tahun 1979, khususnya pada zaman Dato’ Patinggi Abdul Taib Mahmud menjadi Menteri Pertahanan, namun idea tersebut hanya dapat dilaksanakan pada tahun 1980 apabila YAB Dato’ Seri Dr. Mahathir Mohammad, Perdana Menteri Malaysia dan Datuk Abdullah Ahmad Badawi, Menteri Pertahanan pada waktu itu telah menggesa penubuhan



sebuah kor untuk mengendalikan hal ehwal keagamaan dalam ATM dilaksanakan dengan segera.

Penubuhan KAGAT selaras dengan Dasar Penerapan Nilai-nilai Islam<sup>1</sup> yang telah dilancarkan oleh kerajaan pada waktu itu. Hasilnya pada 24 Jun 1980, Majlis Angkatan Tentera (MAT) melalui persidangan kali ke 197 telah bersetuju dengan penubuhan Kor Agama Angkatan Tentera atau singkatannya KAGAT. Selanjutnya pada 16 April 1985 penubuhan KAGAT telah mendapat persetujuan dan limpah perkenan Seri Paduka Baginda Yang Dipertuan Agong ke VIII, Sultan Iskandar Ibni Al-Marhum Sultan Ismail, selaku Panglima Tertinggi Angkatan Tentera Malaysia ketika itu dan KAGAT secara rasminya ditubuhkan pada tarikh yang sama iaitu 16 April 1985. Dengan penubuhan tersebut, KAGAT merupakan kor yang ke 16 dalam Tentera Darat Malaysia dan penugasannya meliputi ketiga-tiga perkhidmatan Angkatan Tentera Malaysia yang merangkumi perkhidmatan Darat, Laut dan Udara (Risalah KAGAT, 1986).

Seterusnya pada 29 November 1984, Persidangan Majlis Angkatan Tentera ke 238 telah meluluskan skim perkhidmatan Kor Agama Angkatan Tentera (Kertas Minit Mesyuarat Majlis Angkatan Tentera kali 238). Selanjutnya melalui persidangan Majlis Angkatan Tentera ke 249 pada 29 Mac 1986, pihak MAT telah meluluskan syarat-syarat pertukaran perkhidmatan Pegawai Hal Ehwal Islam di bawah Jabatan Perkhidmatan Awam kepada Kementerian Pertahanan di bawah skim perkhidmatan tentera (Kertas Minit Mesyuarat Majlis Angkatan Tentera ke 249 pada 29 Mac 1986). Dengan penubuhan KAGAT pada waktu itu dengan jelas ia berhasrat untuk mencapai matlamat berikut:

- a. Memenuhi keperluan agama anggota Islam ATM dan keluarga mereka.
- b. Menyediakan kemudahan dan pendidikan agama Islam bagi masyarakat tentera di masa aman, kecemasan atau peperangan.
- c. Membina akhlak murni, keteguhan dan disiplin yang kukuh dalam

---

<sup>1</sup> Dasar Penerapan Nilai-Nilai Islam yang diperkenalkan oleh kerajaan tidak bertujuan untuk mengislamkan orang bukan Islam. Hasrat kerajaan ialah supaya semua rakyat Malaysia dapat menghayati nilai-nilai murni Islam yang baik dan tidak bercanggah dengan ajaran agama-agama lain, yang merangkumi pelbagai aspek seperti pentadbiran, pengurusan, pendidikan, ekonomi dan sosial. Nilai-nilai universal atau sejagat Islam yang dijadikan asas dasar ini ialah amanah dan bertanggungjawab, ikhlas, berbudi mulia dan bersyukur. Penerapan nilai-nilai ini dapat menghapuskan amalan buruk seperti rasuah, penyelewengan, jenayah, penindasan dan penyalahgunaan kuasa (Dasar Penerapan Nilai-Nilai Islam, BAHEIS:1980).

kalangan anggota ATM berasaskan kepada penerapan nilai-nilai Islam yang sesuai dengan masa dan keadaan.

- d. Menyelesaikan masalah-masalah pentadbiran agama Islam mengikut perundangan-perundangan yang dikuatkuasakan dari masa ke masa, khususnya dalam hal ehwal syariah dan hubungan kait antara ATM dengan masyarakat awam.
- e. Berusaha mengurus apa jua perkara yang didapati perlu oleh pihak berkuasa demi kebaikan dan perkembangan Islam dalam ATM (Di persada Kegemilangan, 2005).

## HASIL KAJIAN

Hasil kajian menunjukkan usaha-usaha pematuhan syariah dalam pelbagai dasar, program dan aktiviti dalam ATM pada hari ini dalam memenuhi pematuhan syariat telah meningkat dan terus diusahakan sekaligus memberikan impak yang besar terhadap kejayaan KAGAT dalam pelaksanaan dakwah secara lebih menyeluruh dan berterusan dalam usaha membina Angkatan Tentera Malaysia yang berwibawa serta mempunyai daya tempur yang kuat serta rohani yang mantap.

### Usaha-Usaha Ke Arah Pematuhan Syariah

Organisasi Angkatan tentera Malaysia bermula dengan penubuhan Rejimen Askar Melayu pada tahun 1933 oleh pihak British dan tentunya banyak sekali tradisi dan amalan peninggalan pihak penjajah masih diwarisi oleh organisasi ATM. Sehubungan dengan itu, antara usaha-usaha awal yang dilakukan KAGAT telah memberikan penjelasan tentang kepentingan Islam dalam organisasi ketenteraan serta perlunya setiap warga ATM dan para pemimpinnya memahami Islam dengan sebaik-baiknya.

Selanjutnya KAGAT telah menyusun perancangan dan dakwah secara *wasatiyyah* bagi menjayakan lagi Dasar Penerapan Nilai-nilai Islam khususnya dalam aspek pentadbiran, pengurusan dan dasar. Kolonel Abdul Hamid Zainal Abidin sebagai Pengarah KAGAT yang pertama, menyedari tentang amanah dan tanggungjawab besar yang dipikul iaitu untuk memperkukuhkan Dasar Penerapan nilai-nilai Islam yang telah diperkenalkan oleh Perdana Menteri Malaysia Dato' Dr. Mahathir Mohammad pada tahun 1983, dalam Angkatan Tentera Malaysia. Sehubungan dengan itu KAGAT telah memainkan peranan penting melaksanakan amanah tersebut melalui Jawatankuasa Penerapan Nilai-

nilai Islam ATM (JIPNI) dengan pihak KAGAT sebagai sekretariatnya. Hasil kajian menunjukkan melalui jawatankuasa ini KAGAT telah berjaya mengimplementasikan perkara-perkara berikut:

### **Pengharaman arak dalam ATM**

Kor Agama melalui Jawatankuasa Penerapan Nilai-nilai Islam telah membawa usul tentang cadangan pengharaman arak dalam ATM kepada Jawatankuasa Panglima-Panglima Angkatan Tentera (JPP). Sehubungan dengan itu dalam mesyuarat Jawatankuasa Panglima-panglima kali ke 316 telah meluluskan penguatkuasaan Arahan Pengharaman Arak dalam ATM. Melalui arahan ini, semua anggota, wisma, formasi, pangkalan atau pasukan ditegah mengadakan kegiatan penjualan, penyimpanan atau penggunaan semua jenis arak dalam semua aktiviti dalam melibat acara atau premis dalam ATM (Burhanuddin Jalal, 2018).

### **Meraikan kejayaan melintasi garisan khatulistiwa**

Dalam aktiviti pelayaran satu amalan yang dilakukan oleh mana-mana kapal yang berjaya melintasi garisan khatulistiwa merupakan salah satu kejayaan yang besar dan bersejarah. Oleh yang demikian, mana-mana kapal yang berjaya melintasi garisan tersebut akan ‘merayakan’ kejayaan tersebut dengan satu ‘istiadat’ yang tersendiri bagi mengelakkan sebarang kejadian yang tidak diingini. Kepercayaan dan aktiviti tersebut turut diamalkan oleh anak-anak kapal yang terlibat dalam pelayaran yang dilakukan oleh Angkatan Tentera Laut Malaysia (TLDM). Menyedari amalan khurafat tersebut, KAGAT telah membuat penyelidikan dan kertas laporan khas kepada pihak Jawatankuasa Panglima-panglima bagi menolak amalan tersebut dari terus diamalkan dalam Tentera Laut Diraja Malaysia. Sehubungan dengan itu, mesyuarat Jawatankuasa Panglima-panglima ATM melalui mesyuaratnya kali ke 316 telah memutuskan Upacara khas bagi merayakan kejayaan melintasi garisan khatulistiwa merupakan istiadat agama lain dan nyata bertentangan dengan syariat dan akidah Islam. Kejayaan tersebut perlu digantikan dengan acara yang lebih sesuai dengan kehendak agama Islam seperti majlis bacaan Yasin dan doa selamat (Burhanuddin Jalal, 2018).

### **Pindaan Dasar Perkahwinan Sesama Anggota Tentera**

Berdasarkan peraturan perkahwinan yang diwarisi dari pihak Tentera British, antara lainnya menyebut, “*perkahwinan seorang anggota berpangkat pegawai dengan pegawai adalah dibenarkan, akan tetapi perkahwinan antara pegawai dengan anggota lain-lain pangkat tidak dibenarkan*”. Menyedari hakikat bahawa amalan ini juga bertentangan dengan agama Islam, usaha-usaha untuk mengubah dasar ini pun dilakukan (Jabatan Arah KAGAT, 2019).

### **Pemansuhan Acara Tepung Tawar Dalam ATM**

Dalam era tahun 70-an, 80-an dan awal 90-an banyak sekali majlis atau acara tepung tawar, khususnya dalam majlis perasmian alat-alat ketenteraan yang baru diperolehi. Menyedari tentang amalan ini adalah bertentangan dengan Islam, KAGAT berusaha untuk memansuhkan acara ini dan telah berjaya untuk pemansuhan acara tersebut melalui Mesyuarat Jawatankuasa Panglima-panglima siri 334 (Jabatan Arah KAGAT, 2019).

### **Pelaksanaan Pakaian Menutup Aurat Anggota wanita ATM**

KAGAT telah membantu dalam usaha pelaksanaan pakaian menutup aurat dan kebenaran memakai tudung kepala khasnya untuk anggota wanita ATM yang beragama Islam. Pihak Majlis Angkatan Tentera Malaysia telah meluluskan cadangan pengubahsuaian pakaian wanita Tentera Darat, Tentera Laut dan Tentera Udara Diraja Malaysia dari bentuk pakaian lama ‘baju berlengan pendek dan kain skirt’ kepada pakaian yang lebih sopan, menutup aurat dan sesuai dipakai oleh wanita Muslim yang berkerjaya sebagai pegawai dan anggota tentera wanita (Jabatan Arah KAGAT, 2019).

### **Perkara yang berkaitan dengan regimental**

Pihak KAGAT juga telah memberikan pandangan kepada ATM untuk menghentikan beberapa perkara yang bertentangan dengan syariat Islam. Antara perkara yang disebutkan itu ialah seperti amalan tiupan tetuang bersama amalan khurafat, bertafakur di Tugu Pahlawan, Hormat Quarter Deck, serta pergerakan dan menyilang pedang dalam pergerakan kawad (Khairul Fauzi Azmi, 2013).

### **Pendekatan pengukuhan amalan Syariah**

Selain dari itu antara kejayaan terbesar yang dapat dilaksanakan dalam usaha pengukuhan dakwah dalam ATM serta untuk memberikan

pendidikan dan penghayatan Islam yang lebih kukuh kepada setiap warga negara Malaysia yang beragama Islam yang masuk berkhidmat dengan Perkhidmatan Angkatan Tentera Malaysia pihak KAGAT telah mengusahakan satu dasar yang dinamakan Dasar Pembinaan Mental dan Kerohanian Islam. Melalui dasar ini setiap anggota Tentera Malaysia yang beragama Islam, selama sepanjang perkhidmatannya adalah diwajibkan menerima pendidikan khas bagi tujuan pembinaan mental dan spiritual Islam dengan bimbingan-bimbingan dan panduan-panduan tertentu yang akan dikeluarkan dari semasa ke semasa (PMAT 9/91). Melalui dasar yang telah diwartakan ini, terdapat dua bentuk pembinaan yang dibentangkan dalam dasar ini sebagai tambahan kepada dasar latihan jasmani yang sedia ada, bertujuan melahirkan perajurit yang memiliki ketahanan fizikal, mental dan spiritual. Bentuk pembinaan tersebut adalah seperti berikut menguasai perkara-perkara berikut:

- a. Ketahanan mental, melalui pengisian ilmu pengetahuan Islam yang mencakupi ilmu-ilmu fardu ain dan ilmu-ilmu fardu kifayah.
- b. Ketahanan spiritual latihan dan penghayatan amal Islam yang sah dan tepat.

Ilmu yang disampaikan dan penghayatan amal Islam memainkan peranan penting dalam membentuk akhlak mulia dalam kalangan anggota tentera. Ini selari dengan penekanan tentang pentingnya akhlak mulia dalam menentukan tahap atau standard baiknya seorang Islam. Hadis Rasulullah SAW yang bermaksud: *Sesungguhnya sebaik-baik manusia di antara kamu adalah orang yang paling baik akhlaknya* (HR. Bukhari No. 6035).

## **Dasar Pembinaan Mental Dan Kerohanian Islam**

Dalam aspek ketahanan mental, setiap anggota Islam yang berkhidmat dalam perkhidmatan tentera Malaysia hendaklah boleh melaksanakan tuntutan fardu ain dan fardu kifayah dengan betul dan sempurna. Perlakuan, perbuatan atau amalan menyeleweng dari ajaran agama adalah tidak dibenarkan dalam Angkatan Tentera Malaysia, oleh itu selama seseorang anggota itu berkhidmat dengan perkhidmatan tentera mereka diwajibkan:

- a. Memiliki fikrah keislaman yang matang dan mantap serta bersih dari sebarang unsur-unsur negatif yang terpelihara dari terpengaruh dengan aliran-aliran pemikiran salah yang menyeleweng dari ajaran Islam yang sebenarnya.
- a. Menerima pendidikan-pendidikan asas keislaman yang

merangkumi perkara-perkara berikut iaitu pendidikan asas fardu ain, pendidikan asas fardu kifayah, pendidikan jihad, pendidikan kekeluargaan, pendidikan akhlak, pendidikan kepimpinan, pendidikan al-Quran dan Sunah, pendidikan ibadah, pendidikan tamadun Islam dan tasawur Islam.

Bagi menjayakan dasar ini, semua Pusat Latihan, formasi, dan pasukan hendaklah wajib menyediakan masa tidak kurang dari 857 jam setahun untuk membolehkan anggota-anggota di bawah pemerintahan mereka mendapat pendidikan seperti di atas. Dalam aspek ketahanan kerohanian semua anggota tentera Malaysia yang beragama Islam, di sepanjang perkhidmatan akan diberikan latihan dan pendidikan kerohanian agar menjadi tentera yang mempunyai ciri-ciri, Muslim, Mukmin, Muhsin berdasarkan program yang telah diatur dan ditetapkan (Burhanuddin Jalal, 2018).

### **Pengukuhan Peranan Organisasi KAGAT**

Perkembangan semasa dalam pembangunan organisasi ATM telah mendorong barisan tertinggi dan kepimpinan ATM untuk melihat kembali aspek modal insan anggotanya. Mereka merasakan aspek material semata-mata tidak menjamin kekuatan pasukan dalam erti kata sebenar. Arus pemodenan dari segi teknologi persenjataan, strategi pertahanan dan pembangunan tenaga manusia perlu seiring dengan pengukuhan dari sudut dalaman para pegawai dan anggotanya. Dalam erti kata lain, pemodenan ketenteraan yang ingin dicapai tidak memberi sebarang makna sekiranya ia hanya sekadar membuatkan ATM bermegah kepada kekuatan lahiriah organisasinya semata-mata sedangkan ia goyah dari segi kekuatan dalaman (Kolonel Abdul Hamid Zainal Abidin 1992).

Hasrat dan harapan penubuhan KAGAT juga adalah di atas dasar dan pendirian ATM yang ingin melihat perubahan di dalam organisasinya ke arah penerapan nilai-nilai Islam yang lebih berkesan. Ia mempunyai fungsi dan peranannya yang tersendiri sejajar dengan objektif yang telah ditetapkan (Burhanuddin Jalal, 2018). Peranan yang perlu dimainkan oleh KAGAT bukanlah untuk membentuk anggota tentera supaya mempunyai semangat kepahlawanan atau keberanian seperti "*Rambo*" ketika menjalankan tugas atau tanggungjawab mereka. Sebaliknya anggota tentera diasuh agar mempunyai semangat juang dengan menjadikan Rasulullah sebagai contoh yang terbaik. Dalam erti kata lain anggota tentera perlu dididik dengan menghayati seluruh nilai-nilai ketenteraan

seperti tegas, garang dan sebagainya tetapi dalam waktu yang sama, mereka perlu menghayati nilai-nilai yang baik seperti yang dianjurkan oleh Rasulullah dalam hadisnya yang bermaksud: “*malamnya mereka beribadat dan siangnyanya mereka pantas seperti kuda perang*”. Kedua-dua ciri ini perlu digandingkan bagi membina peribadi tentera yang baik dan cemerlang (Mohd Hashim Jamaluddin, 1995).

## KESIMPULAN

Setelah menjangkau 37 tahun penubuhannya, tentunya KAGAT telah mengalami pelbagai pengalaman, peristiwa serta perancangan yang melibatkan warga ATM dan juga organisasi KAGAT sendiri. Bermula dengan sejumlah pegawai dan anggota serta penyerapan anggota agama awam ke dalam KAGAT serta pendekatan ‘tukar kor KAGAT’ di peringkat awal dan hingga kini perubahan yang besar telah berlaku terhadap organisasi perjawatan, pangkat serta bilangan pegawai dan anggota yang kian bertambah, sama ada dari segi bilangan, kemahiran, kecekapan, istiqamah dan juga usaha-usaha dakwah yang berterusan dan berperancangan. Sepanjang tempoh tersebut, KAGAT telah memberikan perkhidmatan pendidikan Islam, penghayatan dan syiar Islam dalam kalangan anggota dan organisasi ATM. KAGAT juga turut memberikan kesan baik dari segi pembinaan imej ATM sebagai sebuah organisasi penting negara yang turut menyokong dasar-dasar kerajaan yang ingin membina sebuah negara Malaysia yang aman dan sentiasa dirahmati Allah. Negara yang dibina dengan dokongan ummah yang bertaqwa akan menjemput rahmat Allah SWT. Firman Allah yang bermaksud: “*Dan sekiranya penduduk negeri itu, beriman serta bertakwa, tentulah Kami akan membuka kepada mereka (pintu pengurniaan) yang melimpah-limpah berkatnya, dari langit dan bumi* (Surah al-A'raf, 7: 96).

Hasil kajian ini telah menyumbang kepada pembangunan ilmu berkenaan pematuhan Syariah di sektor pertahanan negara iaitu ATM kerana kajian seperti ini masih kurang diteroka oleh pengkaji lepas. Hasil kajian ini juga menyumbang kepada pembangunan ilmu berkenaan pendekatan yang digunakan untuk memupuk pematuhan Syariah di sektor pertahanan. Para pentadbir dan anggota di sektor keselamatan boleh menggunakan hasil kajian ini sebagai panduan untuk memupuk pematuhan Syariah di organisasi masing-masing. Kajian ini memfokuskan kepada aspek pematuhan Syariah dan kaedah yang digunakan di ATM. Maka pengkaji akan datang boleh memfokuskan kepada tajuk atau topik

lain, misalnya berkenaan dengan faedah atau impak pematuhan Syariah di ATM atau organisasi pertahanan dan keselamatan lainnya.

## PENGHARGAAN

Penghargaan ditujukan kepada pihak Pusat Penyelidikan dan Inovasi Universiti Pertahanan Nasional Malaysia (PPPI UPNM) yang telah memperuntukkan kajian ini menerusi Geran Penyelidikan Jangka Pendek secara dalaman (Bidang Sains Sosial) pada tahun 2019 iaitu (UPNM/2019/GPJP/SSK/3).

## KONFLIK KEPENTINGAN

Kajian ini dijalankan secara telus berdasarkan fakta yang benar dan tiada sebarang unsur kepentingan terhadap institusi-institusi tertentu.

## SUMBANGAN PENULIS

Mengumpul data kajian, kajian literatur dan teknikal: B.J dan S.A.B.  
Merangka reka bentuk kajian: B.J. Menganalisis data dapatan kajian: B.J, S.A.B, H.A.M dan B.M.N.

## RUJUKAN

- Bahagian Hal Ehwal Islam Jabatan Perdana Menteri (BAHEIS). (1980). *Dasar Penerapan Nilai-Nilai Islam*. Kuala Lumpur: BAHEIS, Jabatan Perdana Menteri.
- Bayan Linnas: Maqasid Syariah dalam Perubatan. (2019). *Bayan Linnas Siri ke 189*. Laman Sesawang Pejabat Mufti Wilayah Persekutan. Diakses daripada internet <https://muftiwp.gov.my/artikel/bayan-linnas/3541-bayan-linnas-siri-ke-189-maqasid-syariah-dalam-perubatan>. Dicapai pada 3 Januari 2021.
- Berita Tentera Darat Malaysia. (2008). Agama Teras Perkhidmatan. *Berita Tentera Darat Malaysia*. Bil. 256. Kuala Lumpur: Markas Tentera Darat Malaysia.
- Braun V. & Clarke V. "Using Thematic Analysis in Psychology." *Qualitative Research in Psychology*, 3 (2) (2006) 77-101.
- Burhanuddin Jalal. (1998). *KAGAT: Wadah dan Profesionalisme*. Kuala Lumpur: Jabatan Arah Kor Agama Markas Angkatan Tentera, Kementerian Pertahanan Malaysia.
- Burhanuddin Jalal. (2018). *Dakwah Askari di Malaysia*. Nilai: Penerbit Universiti Sains Islam Malaysia.
- Ibn Ashur, M.T. (2001). *Maqāṣid Al-Sharī'ah Al-Islāmiyyah*. Amman: Dār al-



Nafā'is.

- Jabatan Arah KAGAT. (2005). *Di Persada Kegemilangan 2005*. Kuala Lumpur: Kementerian Pertahanan Malaysia.
- Jabatan Arah KAGAT. (1986). Kertas Minit Mesyuarat Majlis Angkatan Tentera kali ke-249.
- Jabatan Arah KAGAT. (1986). Risalah KAGAT. Kuala Lumpur: Jabatan Arah KAGAT Markas ATM.
- Jabatan Arah KAGAT. (1991). Perintah Majlis Angkatan Tentera Malaysia. Bilangan 9/91. Kuala Lumpur: Kementerian Pertahanan
- Jabatan Arah KAGAT. (1992). *Profesion Ketenteraan dan Bimbingan Rohani*. Kuala Lumpur: Jabatan Arah KAGAT Markas ATM.
- Jabatan Arah KAGAT. (2019). Laporan tahunan KAGAT 2018. Kuala Lumpur: Jabatan Arah KAGAT Markas ATM.
- Khalid Ahmad Syantut. (2003). *Tarbiah Askariah*. (Terj). Jakarta: Penerbit Era Intermedia.
- Khairul Fauzi Azmi. (2013). Dasar Pembinaan Kerohanian Islam Angkatan tentera Malaysia. Tesis Dr. Fal. (tidak diterbitkan). Universiti Kebangsaan Malaysia, Bangi.
- Kolonel Abdul Hamid Zainal Abidin. (1992). *Amanat Pengarah KAGAT Sempena Ulang tahun KAGAT ke-8*. Kuala Lumpur: Jabatan Arah KAGAT Kementerian Pertahanan Malaysia.
- Majid Khadduri. (1969). *War and Peace in the Law of Islam*. London: The John Hopkins Press.
- Mohd Hashim Jamaluddin. (1995). KAGAT Daie Askari. *Majalah al-Islam*. April. Kuala Lumpur. Utusan Publication Sdn Bhd.
- Mokmin Basri (2012). *Dasar Maklumat Nasional*. Bangi: Penerbit Universiti Kebangsaan Malaysia.
- Muhammad Ahmad Bashil. (1989). *Politik dan Ketenteraan - Perjanjian Hudaibiyah*. Kuala Lumpur: al-Hidayah Publication.
- Muhammad Hashim K. (2011). *Al-Dalil al-Mubassat fi Maqasid al Shari'ah*, terj. 'Abdul al-Latif al-Khiyat. Herndon: Ma'had al-'Alami li al-Fikr al-Islami.
- Muhammad Thalib. (2001). *Tafsir al-Maraghiy*, Volume 9. Kuala Lumpur: Dewan Bahasa dan Pustaka.
- Nina, B. (2020). *Building the Whole Soldier: The Role of Spirituality in Mental Health and Resilience*, TRADOC Communication Directorate. December 8, 2020, dari internet: [https://www.army.mil/article/241538/building\\_the\\_whole\\_soldier\\_the\\_role\\_of\\_spirituality\\_in\\_mental\\_health\\_and\\_resilience](https://www.army.mil/article/241538/building_the_whole_soldier_the_role_of_spirituality_in_mental_health_and_resilience), accessed on 30 January 2022.
- Wahbah Al-Zuhaily (1994). *Fiqah dan Perundangan Islam* (Terj). Kuala Lumpur: Dewan Bahasa dan Pustaka.

